


www.BibleForChildren.org

Matyu Nanda'afi 26



Nimaguf
wanif wanif
ata' fapoma esis
Juda sonda'
gwa'aisi isimba
lu'wasi Pasova. Nema
afamba Jisas a' nataga
wambel Betani, alipunai
Lasarus nagapoma.
Fowa' naga'ma Jisas
nasa'mana nogosafel
wapanii. Ea' Maria
kwahapila anop kap
si'ipa sanda bu'wani
agilina nad sagatalin
otamba hiambaii.



Ea' kwahapilan
kwakolo'wan
kwandisamana
bo'wagah Jisasi kwanda'
auf balaga ako'ugai kopati'manan.
Ea' ipat atamba asi'itama alogw
bu'wagwi ma sanda inimbai.



Amam amamba Jisasi 12-pelaim anona amamunai
agilinama Judas Keriotinai a nafe' gani amom pris
dembami magapoma. Anen na'i
ni'ipama Jisas atona nogapoma
mofe' mogombalo'ana. Amom
mame' basef ananifi
sonaham endilisi.



Ea' ma'i basef mandame'maef na'amba ma'i,
“Andeande', afa' a' ose'ena anin moni.” Ea' Judas
na'i aho' a' nala' nolaoma ano'w
ufia'wa nigihimba'mama Jisas
amoma mogombalo'ana.




Ea' amom alipumi ananimit
manda'as na'amba atin si'i anen
naga'ipam ea' manda' gwa'aisi
Pasovai dumbili dombol. Jisas
nalomam ata' mape ma' gwa'aisi
atin, ama main, nasa'ma anota bret,
nandabeten nanifela God, nawalota
naso'am na'ipam na'i, "Ipa' sa'mata
pea'ata. Bret atamba
alop ae'api."




Ea' nasa'mai anop kap embel wain bagalapi nanifela God, naso'am na'ipam na'i, "Ipa' hipai gwa'embel atin. Embel ambalemba esimbel ae'ambeli bewa' banaga basef ifimba God nagala' lapafi dambaifi. Esimbel ambalemba ae' ekolo'wambela God nokwahomasa waf awafi epes hiasii okom mogaso'anaf."



Ea' Jisas na'i, "Saimon, Saimon, ina' neme'. God na'i aho'ma Satan nogwamba ipa' ma penda' waf awafi si'i sogogakisa rais ama bu'wami mafe' anagon awami magafe' anagon daiagon. Apa' owa' atin. Ae' andabetena egatopalopena ma banagena nigahapifa ae' atapina. Atiasi nembema nembel newa' banaga owapena ine'imi."



Owa' Pita nagwamana na'ipana na'i, “Dembina, ae' ea' anda'as dumbulidombola elomena ogafe' kalabus. Ae' anda'as dumbulidombola ega' egalomena wapani.” Ea' Jisas nagwamana basef na'i, “Pita, ae' a'ipina endilisi! Atiasi owamb amba'e awata ata' owa' totaea, ina' a' nendahali'mi ni'ias wanif ni'i, ‘Ae' owa' egawa Jisasa.’”



Jisas nao'wa alipumi
ananimi mafe' atin anagon
Getsemani lawah oliv
hogotawama. Ea'
na'ipam na'i, "Ipa' pepe
na'a, ae' efe' gani wa'ol
endabeten." Ea' nahali'
God na'i, "O, Ahame ina'
banaginai ma nanda'
hiahaom hiami hi'agalami.
Nekwahome kap apamba.
Apa' owa', ina' nindaila
okom ine'imi atom, ae'
owa'."




Ea' Judas nafi'i nao'wa anom soldia maloma anom plisman amom pris maloma amom Farisi masapa'am magafi'i. Amom mahapila bagah nagwahis lambeh maloma hiahaom sagapa'ami mofa'am atin mafi'i anamba. Owa' anona amom alipumi ananimi naha anona aman nanda'mana maola pris dembinai nape nagali'ma pris hiamii ea' natopa' aliga kwahisigai pele'ataga gowa. Owa' Jisas nataloga amom na'i, "Kwaha waf afambai, ea' hapaifi." Ea' Jisas nasa lagol aliga aman anambai, gataga bo'oga wapani.



Jisas na'iasa ea' amom mahapilana mofa'ana mafe' mawis ipat pris dembinaii. Apa' Pita ina nalomam nafe' atef, owa', nagigi'mam nafe' nail laogon. Esis sakata nif indalelemb ambalemba nomon ipat tagapoma mapomef. Ea' Pita nape nalomam.



Ea' anona aman nape
felefele'ma Pita. Anen
nanda' maola pris
anamba dembinai.
Anen amom atom
wambota atota aman
anamba doko' Pita nahana
nagatalisa nagakwalisa
aliganai. Ea' na'ipa Pita na'i,
“Endilisi atis, ae' ati ina' nape
nagaloma Jisasi ganimba lawah
oliv hogatawama.” Ea' Pita nandahali'
na'i wapani na'i, “Ae' owa'.” Anen
ata' na'i atin, owa', awata atata.
Ea' Pita nawisi nafe' ando' nalef mehip.





Ea' amom dembami hiami mosafel
mofa' Jisas mafe'ma dembinai
gavman Pailat. Ea' Pailat nahali'ana
na'i, "Ina' king dembinai Judai a'a
owa'?" Ea' Jisas nagwamana basef
na'i, "Basef ifimba ina'
naga'iefi endilisifi." Pailat
na'i nokwahowa Jisas nefe'
wahifina, ea' nahali'as
wapani. Owa', sogas sa'i

mehip sa'i, "Hana noga', hana
noga' lawag usi'igai ti'wanaegai."




Ea' Pailat nakwahomasa Jisas
esis Juda ma sogandolona
lawag usi'igai ti'wanaegai. Ea'
amom soldia mowa' Jisas
mofa'ana mafe'. Jisas atotona
nofa' lawag ananigai a' nafe'
nakwaha wambel lu'wambili
nawis ando' nafe' nataga
anagon agiligima Pipitagol
Balagaigil. Diga Hibrui sa'i
Golgota.



Anamba amom mowa'ana lawag usi'igai
ti'wanaegai naloma anom amam biam.
Anona nail wa'ol, anona nail wa'ol,
ea' Jisas nail la'afen.



Ea' anona lowaf lu'unai si'i utai nagail ipat Godi lu'unai nomoni palalana hi'alana nandawal nataga biafina. Ea' Jisas galala mehip na'i, "Ahame ae'inai, ae' a' ese'enago ambal ae'ali lofo'o lagol ine'igili." Anen na'ias na'ambama ea', naga' dogw.



A'i owa' wambomota felefele'ma
owamb, Josep Arimateainai nafi'i.

Anen dembinai ma kot esis
Judai, agol lu'wagilinai.

Nape nohafa nemaf
bu'wafi fegataga ma
hiasi sogawis
nomona maol Godi
nope Dembinai
nugumafias.

Dei' sanda'
hiahaom gwa'aisi
mais dumbulidombola
naman nemaf afamba
sabat fegataga. Ea'
Josep nafe' nawis
nalutu naep Pailati. Anen
ina ombal mahana, owa'.
Nahali'ana ma nofa'i
alop Jisasi nogawana.



Fowa' anis sanda' anota matmat
sagwasa otam lu'unai nagal
nawis nomon. Ea' dei' Josep
na'i nowa Jisas matmat
atamba. Ea' nafe' notala
anona lowaf afitinai
nafi'i natagwaha alop
Jisasi nisila'i ma
nanda' lowaf
anamba

nowa'ana ma ea',
nasapa'ana nawis
matmat atamba nalana
nomon. Ea' nambema
anona otam lu'unai nafe'
nowalo uta matmat
atamba.



Ama a'i owa' wafilu nemaf
sagandomba hiahawes
gwa'aisi maisafi afamba
fafa'ma ea', amom pris
dembami maloma
amom Farisi
dembami mafe'
malagama Pailat.



Ea' ma'ipana ma'i, "Dembina'i, afa' a' ukup papoma anif basef aman anamba nagambaso'ami naga'iefi fowa' anen ata' nagape. Anen naga'ias na'amba na'i, 'Nimaguf wanif a' fefe'ma hi'ilif owa', ae' a' itanima esafel wapani."



Ea' amom mafe' mowalowa matmat
sisihita ea' manda'ima uta
masaho'mata manda'
anin ametal banagani ma
epes ina a suwalin
suwis. Ea' ma'ipa
anom soldia mape
mumafiagon.



Nemaf afamba esis Juda sagapoma
noma'wafi sabat fafe'ma hi'alaf,
ea' sande nemaf fagali'ma
wiki, kuhumbita atota
felefele'ma awin
nigatafi, nematawa
awamba biawa
Maria Makdalai'wi
kwaloma ano'w

agol atogol wafi'i
ma ugati matmat.



Ea' kwafalis atis imauna lu'unai
nasol mehip. Ea' anona ensel
Dembinaii nisila'i gani
heven, a' nafe' nelefata
owap apamba
pegewalo utai nafe'
na'oh wa'ol a tol
natomana.

Ea' amam
amamba soldia
mugumafi matmati
a' ombal maham
kwapete' a'owa'
ambombol atin
ma'oh itap si'i
sagaga'i.



Owa' ensel anamba na'ipa awo biawa
na'i, "Ipa' bipa ina ombal mehepa,
owa'i. Ae' egawa ipa' pafi'i
pa'i pelaoma Jisas, aman
anamba esis
sagandolana lawag
usi'igai ti'wanaegai.
Anen ina ata' nape
na'a, owa'.



Anen a' notanima nosafel ea' si'i
fowa' naga'ipipa! Ipa' fi'i ma ata'
piti na'a naga'oma. Dei' a'
wafigin nape.




Ea' awo ombal magahawai dei' ea'
sonahawa wapani, kwafalis atis
wakwaha matmat wasagih wafe'ma
uga'ipa amom alipumi ananimi.
Owa' Jisas nati awo ufa'w
nanda'mawa gude na'i, "Nemaf
bu'wafi endilisi." Ea' awo wafe'
felefele'ma anen wahapila

bo'wagah
ananigahi ma

onda' lotuma anen.





A'i owa' main, alipumi 11-pelaim Jisasi mape ma' gwa'aisi atin, Jisas nafe' natagamam. Nimbewa' anis satolona notanima nogosafel wapani ea' sa'ipamana, apa' owa'. Amom ina mahapifas ma'i sa'i endilisi, owa'.

Ma'i owa' sambaso'mam atin. Ea' Jisas nanda' megahaham. Dembinai Jisas nawalipas na'ipas ea', God nofa'ana nalota heven. Ea' nofa' agol lu'wagili nape lagol kwahisigili Godi banagagili.



Aho' endilisi, God nogamana aman ananinai
atotona nape. Owa', owa'atin. Anen okom
maimaila amam nematawa hiapai magape
itapi hi'alapa. Ea' naso'apai Nogamana
ananinai atotona ma epes ami
sogahapifanai sogape andeande', ina
soga'ma waf awafi, owa'atin.
Sofa' ambal namili sope
andeande'
lifilafi.



Fagafe'ma Esis Romi 3:23

Apa' epes hiapai hi'alapa manda' waf awafi mumbisila'
mu'uli Godi ea' ina la'ifipama atiasi mogati mogogala'i
bu'wami ananimi, owa'atin.

Fagafe'ma Esis Romi 6:23

Waf awafi fagwamasa awami ma isimba sanda' maola waf
awafii. Awami amamba. Esis atiasi sogaa' atin higililas. Apa'
God dei' naso'apai presen fasini dowaf, inimba ambal
namili lagape dondoli ma mope sisihipa
mogoloma Kraisi Jisas.

Hibrui 9:27

Epesi hiasi hi'ilas anaf sogaa' atetef owagama sulutuma
basef lu'wafi Godi nonda' kotimasafi.



Fagafe'ma Esis Efesusi 2:8,9

Dei' main, God natopalopepa dowaf, isimba atis dei' nofa'epa pitanimai pahapifa Kraisi. Hiahaom amamba ina ipa' atipa panda'am, owa'atin. God atona nase'epam dowaf. Amamba ina si'i hiahaom ipa' panda' maol pegefa'ami, owa'. Ea' ina anin epen atitin la'ifina negasa'ma agol ananigili atogola hiahaom amamba, owa'atin.

Fagafe'ma Esis Romi 10:9,10

I'i ipa' pewalapa basef ifimba alihif pi'i Jisas anen Dembinai ma pihapifa God nelelemb ipe'ilimbi pi'i anen nasa'mana nogosafel matmat wapani, bola God nofa'ai ipa' wapani pitanimai pepe andeande'. Dei' main, apa' mahapilif nelelemb ape'ilimbi God na'i apa' amam nematawa magataga be'epa hilili' ea'i. Ea' mawalapa hapif malogof ape'igufi God nofa'apa nokwahomapa waf awafi mutanimai mape andeande'.



Jon Nanda'afi 3:16,17

Aho' endilisi, God nogamana aman ananinai atotona nape. Owa', owa'atin. Anen okom maimaila amam nematawa hiapai magape itapi hi'alapa. Ea' naso'apai Nogamana ananinai atotona ma epes ami sogahapifanai sogape andeande', ina soga'ma waf awafi, owa'atin. Sofa' ambal namili sope andeande' lifilafi. God ina nasapa' Nogamana ananinai nafi'i itap apa'e ma nonda' kotimapa, owa'atin. Anen nasapa'ana nafi'i ma nimbimai epes hiapai magape itapi nokwahomapa waf awafi mogafi'mai anen.



1 Jon 5:11-13

Ea' basef ifimba endilisifi na'amba. God a' naso'apa ambal namili ma mogape andeande' lifilafi dondol. Ambal namili alamba anen naso'apala Nogamana ananinai atona. Epen ami negape sisihina negaloma Nogamanai, inimba dei' nefa' ambal namili. Apa' ami owa' nepe sisihina Nogamana Godia, inimba ina nefa' ambal namili ma negape andeande' lifilafi, owa'atin. Ae' anda' basef fafe'mago ipa' pagahipifa agol Nogamana Godi. Anda'efa ipa' pegegawa dei' apefa' ambal namili pape andeande'.



Matyu Nanda'afi 26-28; Luk Nanda'afi 22-24;
Jon Nanda'afi 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Mufian NT (aoj) © 2013, Wycliffe Bible Translators, Inc.
All rights reserved.

<https://www.bible.com/bible/952/MAT.1.AOJM>

©2025 Bible for Children, Inc.

www.M1914.org

www.bibleforchildren.org

